

## Kedudukan Al-Sunnah Sebagai Sumber Sistem Pendidikan Islam

### Pendahuluan

Al Sunnah adalah sumber kedua yang terpenting selepas al-Quran dalam syariah Islam. Dalam sistem pendidikan Islam, al-Sunnah juga merupakan sumber kedua terpenting. Kedudukan al-Sunnah sebagai sumber hukum dan sumber pendidikan dalam Islam dinyatakan oleh Allah swt dalam beberapa ayat al-Quran, di antaranya, firman Allah swt :

يَتَأْتِيهَا الَّذِينَ ءَامَنُوا أَطِيعُوا اللَّهَ وَأَطِيعُوا الرَّسُولَ وَأُولِي الْأَمْرِ مِنْكُمْ ۗ فَإِن تَنَزَعْتُمْ فِي شَيْءٍ  
فَرُدُّوهُ إِلَى اللَّهِ وَالرَّسُولِ إِن كُنتُمْ تُؤْمِنُونَ بِاللَّهِ وَالْيَوْمِ الْآخِرِ ۚ ذَلِكَ خَيْرٌ وَأَحْسَنُ تَأْوِيلًا .

Bermaksud : Wahai orang-orang yang beriman, taatlah kepada Allah dan taatlah kepada Rasul serta pemerintah di kalangan kamu. Jika sekiranya kamu berselisih pendapat dalam sesuatu perkara, maka kembalilah kepada kitab Allah dan Sunnah RasulNya, jika kamu orang-orang yang beriman dengan Allah dan Hari Akhirat.

(Surah al-Nisa' ayat 59)

Rasulullah saw bersabda yang bermaksud :

Aku tinggalkan kepada kamu dua perkara yang tidak mungkin kamu akan sesat selagi kamu berpegang teguh dengan kedua-duanya iaitu al-Quran dan sunnahKu.

(Hadis Riwayat Muslim)

Sesuai dengan kedudukan al-Sunnah sebagai sumber kedua terpenting dalam syariah dan pendidikan Islam, Allah swt menyatakan di dalam KitabNya bahawa Rasulullah saw adalah rahmat kepada seluruh alam :

لَقَدْ كَانَ لَكُمْ فِي رَسُولِ اللَّهِ أُسْوَةٌ حَسَنَةٌ لِّمَن كَانَ يَرْجُوا اللَّهَ وَالْيَوْمَ الْآخِرَ وَذَكَرَ اللَّهَ كَثِيرًا

Bermaksud : Sesungguhnya pada (diri) Rasulullah itu contoh teladan yang baik bagimu (iaitu) bagi orang yang mengharap (rahmat) Allah dan (kedatangan) Hari Kiamat serta banyak menyebut nama Allah.

(Surah al-Ahzab ayat 21)

Dalam firman yang lain, Allah swt menyatakan :

لَقَدْ مَنَّ اللَّهُ عَلَى الْمُؤْمِنِينَ إِذْ بَعَثَ فِيهِمْ رَسُولًا مِّنْ أَنفُسِهِمْ يَتْلُوا عَلَيْهِمْ آيَاتِهِ  
وَيُزَكِّيهِمْ وَيُعَلِّمُهُمُ الْكِتَابَ وَالْحِكْمَةَ وَإِن كَانُوا مِن قَبْلُ لَفِي ضَلَالٍ مُّبِينٍ ﴿١٦٤﴾

Bermaksud : Sesungguhnya Allah telah memberi kurnia kepada orang-orang yang beriman ketika Allah mengutus seorang Rasul dari golongan mereka sendiri, yang membacakan kepada mereka ayat-ayat Allah, membersihkan (jiwa) mereka, dan mengajarkan kepada mereka al Kitab dan al Hikmah (al-Sunnah) dan sesungguhnya sebelum (kedatangan Nabi) itu, mereka adalah benar-benar dalam kesesatan yang nyata.

(Surah al-Imran ayat 164)

Firman Allah swt lagi:

بِالْبَيِّنَاتِ وَالزُّبُرِ وَأَنْزَلْنَا إِلَيْكَ الذِّكْرَ لِتُبَيِّنَ لِلنَّاسِ مَا نُزِّلَ إِلَيْهِمْ وَلَعَلَّهُمْ يَتَفَكَّرُونَ

Bermaksud : Keterangan-keterangan (mukjizat) dan kitab-kitab, dan Kami turunkan kepadamu al Quran, agar kamu menerangkan pada umat manusia apa yang telah diturunkan kepada mereka supaya mereka memikirkan,

(Surah al-Nahl ayat 44)

Umumnya ayat-ayat al-Quran yang telah dibentangkan di atas, menjelaskan betapa pentingnya kedudukan al-Sunnah dalam syariat Islam serta sumbangan besarNya dalam sistem Pendidikan Islam. Sehingga Allah swt memerintahkan Rasulullah saw supaya menjelaskan semua ayat-ayat al-Quran, disampai dan diperincikan kepada manusia melalui sunnahNya.

Menurut Mudasir Rosder dan Che Yusuf Che Mat (1989), Rasulullah saw melakukan apa saja yang disuruh oleh Allah swt. Sunnahnya terdapat dalam perkataan, perbuatan dan taqirnya. Jika dibandingkan dengan al-Quran, al-Sunnah berperan menghuraikan yang mujmal, menjelaskan yang musykil dan memanjangkan yang ringkas. Oleh itu hubungannya dengan al-Quran tidak boleh dipisahkan langsung.

## Definisi al-Sunnah

Menurut Mustaffa al Siba'i (1997), al-Sunnah menurut bahasa ialah jalan atau tuntutan, samada terpuji atau tercela. Sesuai dengan sabda Rasulullah saw bermaksud :

Sesiapa yang memberi contoh perbuatan yang baik, ia akan mendapatkan pahala perbuatan tersebut serta pahala mereka yang mengikutinya sehingga Hari Kiamat dan sesiapa yang memberikan contoh perbuatan yang buruk ia akan mnendapat siksaan perbuatan tersebut dan siksaan mereka yang menirunya sehingga Hari Kiamat

(Hadith Riwayat Muslim)

Mengikut ulama Hadis, al-Sunnah ialah segala sesuatu yang bersumber dari Nabi Muhammad saw, samada dalam bentuk ucapan (qaul), fi'il (perbuatan), taqrir, akhlak, sopan santun atau usaha perjuangannya samada sebelum ataupun setelah dilantik menjadi rasul.

Sementara ulama fikah menyatakan al-Sunnah ialah segala ketetapan yang berasal dari Nabi Muhammad saw dan bukan hukum fardhu atau hukum wajib. Menurut mereka al-Sunnah merupakan salah satu hukum yang lima, iaitu wajib, sunat, haram, makruh, dan harus. Mana-mana perkara yang tidak termasuk dalam lima hukum ini disebut bidaah.

Ulama usul fikh pula telah membahagikan al-Sunnah kepada tiga bahagian iaitu :

1. al-Sunnah al-Qauliyyah iaitu sabda Rasulullah saw
2. al-Sunnah al-Fi'liyyah iaitu perbuatan Rasulullah saw dan
3. al-Sunnah al-Taqririyyah iaitu persetujuan atau diamnya Rasulullah saw sebagai tanda persetujuan.

Oleh yang demikian mereka memberi perhatian yang mendalam terhadap perbuatan, perkataan dan hal keadaan Nabi Muhammad saw untuk melahirkan dan menentukan hukun Islam yang lima tadi supaya menjadi sumber hukum dan ikutan .

## Kedudukan al-Sunnah Dalam Islam

Sesuai dengan kedudukan al-Sunnah sebagai sumber kedua terpenting dalam Islam, terdapat banyak ayat-ayat al-Quran dan al-Sunnah yang menyentuh berkaitan perkara tersebut. Di antaranya ialah :

### a) Dari al-Quran:

1. Surah al-Hasyr ayat 7 :

وَمَا آتَاكُمُ الرَّسُولُ فَخُذُوهُ وَمَا نَهَاكُمْ عَنْهُ فَانْتَهُوا<sup>ج</sup> وَاتَّقُوا اللَّهَ<sup>ط</sup> إِنَّ اللَّهَ شَدِيدُ

الْعِقَابِ ﴿٧﴾

Bermaksud : Apa sahaja yang diberikan Rasul kepadamu, maka terimalah dan apa yang dilarangnya bagimu, maka tinggalkanlah dan bertakwalah kepada Allah. Sesungguhnya Allah amat keras hukumannya.

2. Surah al-Imran ayat 132:

وَأَطِيعُوا اللَّهَ وَالرَّسُولَ لَعَلَّكُمْ تُرْحَمُونَ ﴿٣٢﴾

Bermaksud : Dan taatilah Allah dan Rasul supaya kamu diberi rahmat.

3. Surah al-Nisa' ayat 80 :

مَنْ يُطِيعِ الرَّسُولَ فَقَدْ أَطَاعَ اللَّهَ<sup>ط</sup> وَمَنْ تَوَلَّى<sup>ط</sup> فَمَا أَرْسَلْنَاكَ عَلَيْهِمْ حَفِيظًا ﴿٨٠﴾

Bermaksud : Sesiapa yang mentaati Rasul, sesungguhnya dia telah mentaati Allah. Dan sesiapa yang berpaling (dari ketaatan itu), maka Kami tidak mengutusmu untuk menjadi pemelihara bagi mereka.

4. Surah al-Imran ayat 32:

قُلْ أَطِيعُوا اللَّهَ وَالرَّسُولَ<sup>ط</sup> فَإِنْ تَوَلَّوْا فَإِنَّ اللَّهَ لَا يُحِبُّ الْكَافِرِينَ ﴿٣٢﴾

Bermaksud : Katakanlah: Ta'atilah Allah dan RasulNya, jika kamu berpaling, maka sesungguhnya Allah tidak menyukai orang-orang yang kafir".

5. Surah al-ahzab ayat 36:

وَمَا كَانَ لِمُؤْمِنٍ وَلَا مُؤْمِنَةٍ إِذَا قَضَى اللَّهُ وَرَسُولُهُ أَمْرًا أَنْ يَكُونَ لَهُمُ الْخِيَرَةُ مِنْ أَمْرِهِمْ<sup>ط</sup>

وَمَنْ يَعِصِ اللَّهَ وَرَسُولَهُ فَقَدْ ضَلَّ ضَلَالًا مُّبِينًا ﴿٣٦﴾

Bermaksud : Dan tidaklah patut bagi mukmin dan tidak (pula) bagi mukminah, apabila Allah dan Rasul-Nya telah menetapkan sesuatu ketetapan, akan ada bagi mereka pilihan (yang lain) tentang urusan mereka. Dan sesiapa yang menderhakai Allah dan Rasul-Nya, maka sesungguhnya dia telah sesat dengan kesesatan yang nyata.

6. Surah al-Nuur ayat 51.

إِنَّمَا كَانَ قَوْلَ الْمُؤْمِنِينَ إِذَا دُعُوا إِلَى اللَّهِ وَرَسُولِهِ لِيَحْكُمَ بَيْنَهُمْ أَنْ يَقُولُوا سَمِعْنَا وَأَطَعْنَا وَأُولَئِكَ هُمُ الْمُفْلِحُونَ ﴿٥١﴾

Bermaksud : Sesungguhnya jawapan orang-orang mukmin, bila mereka dipanggil kepada Allah dan RasulNya agar Rasul menghukum (mengadili) di antara mereka ialah ucapan, "Kami mendengar, dan kami patuh" dan mereka itulah orang-orang yang berjaya.

**b) Dari Hadis:**

1. Apa sahaja yang ditetapkan oleh Kitabullah (al-Quran), tiada alasan bagi sesiapa pun untuk tidak mengamalkannya. Sekiranya tidak terdapat perinciannya dalam al-Quran maka sunnah Nabi-lah yang menjelaskannya.  
(Hadis Riwayat Muslim).
  
2. Setiap umatku akan masuk syurga kecuali yang tidak mahu. Para sahabat bertanya: Wahai Rasulullah siapakah yang tidak mahu masuk syurga itu ? Rasulullah bersabda : Sesiapa yang taat kepadaKu, ia akan masuk syurga dan sesiapa yang berbuat maksiat kepadaKu bererti ia tidak mahu.  
(Hadis Riwayat Bukhari dan al Hakim)
  
3. Semasa Muaz bin Jabal diutus oleh Rasulullah saw menjadi penguasa di Yaman, beliau telah menyatakan kepada Rasulullah saw bahawa beliau akan menghukum dengan al-Quran dan kemudian dengan al-Sunnah. Jika beliau gagal mendapatkan hukum dari al-Quran dan al-Sunnah beliau akan menghukum dengan ijtihadnya. Tindakan beliau telah diperakui dan dipersetujui oleh Rasulullah saw.  
(Wahbah al-Zuhaili)

## **Peranan al-Sunnah Dalam Syariah Islam**

Seperti yang telah dijelaskan bahawa al-Sunnah adalah sumber kedua terpenting selepas al-Quran dalam Syariah Islam. Oleh itu , peranan al-Sunnah dalam syariah sangat besar, antaranya :

## 1. Sebagai memperkukuh dan memperkuat hukum yang ada di dalam al-Quran.

Al-Quran menetapkan sesuatu hukum yang kemudiannya disokong dan diperkuat lagi oleh al-Sunnah. Dengan itu, hukum tersebut mempunyai dua sumber dan dalil hukum, iaitu al-Quran dan al-Sunnah. Contohnya kewajipan mendirikan solat, mengeluarkan zakat, berpuasa Ramadhan, menunaikan haji, berlaku ihsan kepada ibu bapa, jujur dan sebagainya.

Contohnya, firman Allah swt di dalam al-Quran yang menyentuh hukum pengharaman memakan harta orang lain dengan cara yang salah :

يَأْتِيهَا الَّذِينَ ءَامَنُوا لَا تَأْكُلُوا أَمْوَالِكُمْ بَيْنَكُمْ بِالْبَاطِلِ إِلَّا أَنْ تَكُونَ تِجَارَةً عَن تَرَاضٍ مِّنْكُمْ وَلَا تَقْتُلُوا أَنْفُسَكُمْ ۚ إِنَّ اللَّهَ كَانَ بِكُمْ رَحِيمًا ﴿٢١﴾

Bermaksud : Wahai orang-orang yang beriman, janganlah kamu makan (gunakan) harta-harta kamu sesama kamu dengan jalan yang salah (tipu, judi dan sebagainya) kecuali dengan jalan perniagaan yang dilakukan secara suka sama suka di antara kamu. Dan janganlah kamu membunuh dirimu. Sesungguhnya Allah Maha Penyayang kepadamu

Hukum pengharaman memakan harta secara salah telah diperkukuh melalui hadis Rasulullah S.A.W yang bermaksud, “*tiada halal harta seseorang Muslim itu melainkan dengan keredaan dan persetujuan daripadanya*”.

## 2. Sebagai pentafsir kepada al-Quran yang menghurai dan menerangkan maksud al-Quran

Di dalam al-Quran terdapat ayat-ayat yang memerlukan pentafsiran dan penjelasan yang lebih terperinci. Dalam hal ini al-Sunnah telah berperanan sebagai pentafsir yang menjelas dan menghuraikan maksud ayat-ayat al-Quran. Pentafsiran, penerangan dan perincian yang dibawa oleh al-Sunnah terhadap al-Quran boleh disimpulkan kepada empat cara:

### a. Menerang dan mentafsir yang umum

Di dalam al-Quran terdapat nas yang mempunyai maksud ringkas dan umum. Maka al-Sunnah berfungsi menerang dan mentafsir nas tersebut. Umpamanya Allah S.W.T memerintahkan supaya menunaikan solat, tetapi perintah ini tidak menerangkan cara menunaikan solat, waktu, bilangan rakaat, bacaan yang wajib dibaca dalam solat, dan sebagainya. Oleh yang demikian Rasulullah saw telah mengajar dan menunjukkan

kepada para sahabat cara-cara melaksanakan perintah Allah swt ini melalui sunnah Baginda..

b. Mentafsir dan menjelaskan kesamaran.

Terdapat sesetengah ayat al-Quran yang kurang jelas dan samar-samar maksudnya. Ayat tersebut sukar untuk difahami. Sebagai contoh, Allah swt berfirman:

وَكُلُوا وَاشْرَبُوا حَتَّىٰ يَتَبَيَّنَ لَكُمُ الْخَيْطُ الْأَبْيَضُ مِنَ الْخَيْطِ الْأَسْوَدِ مِنَ الْفَجْرِ ۗ

Bermaksud : Dan makan minumlah kamu hingga nyata bagi kamu benang putih daripada benang hitam dari waktu fajar

(Surah al-Baqarah: ayat 187)

Maksud perkataan ‘benang putih’ dan ‘benang hitam’ di dalam ayat ini samar-samar. Melalui pemikiran dan pemahaman akal manusia semata-mata, ayat ini sukar difahami. Untuk menjelaskan kesamaran, maka Rasulullah saw telah menjelas dan mentafsirkan bahawa yang dimaksudkan ‘benang hitam’ ialah waktu malam dan ‘benang putih’ ialah waktu siang.

c. Mengkhususkan yang umum

Terdapat beberapa nas al-Quran yang disebut secara umum, maka peranan al-Sunnah mengkhususkannya. Contohnya, firman Allah swt :

يُوصِيكُمُ اللَّهُ فِي أَوْلَادِكُمْ لِلذَّكَرِ مِثْلُ حَظِّ الْأُنثِيَّٰنِ ۗ

Bermaksud : Allah memerintahkan kamu tentang (pembahagian harta pusaka untuk) anak-anak kamu, iaitu bahagian seorang anak lelaki menyamai bahagian dua orang anak perempuan

(Surah al-Nisa’: ayat 11)

d. Membataskan yang mutlak

Al-Sunnah juga berperanan membataskan nas-nas al-Quran yang mutlak, contohnya, al-Quran telah mengharamkan bangkai dan darah secara mutlak di dalam firman Allah swt :

حُرِّمَتْ عَلَيْكُمُ الْمَيْتَةُ وَالدَّمُ وَلَحْمُ الْخَنزِيرِ

Bermaksud : Diharamkan ke atas kamu bangkai, darah dan daging babi

(Surah al-Maidah ayat 3)

Kemutlakan pengharaman bangkai dan darah ini telah dibatasi al-Sunnah dengan beberapa pengecualian seperti yang terdapat di dalam hadis yang bermaksud, dihalalkan

dua jenis bangkai dan dua jenis darah, bangkai itu adalah bangkai ikan dan belalang, manakala dua jenis darah pula ialah hati dan limpa. Kemutlakan hukum al-Quran dalam perkara tersebut telah di had dan dibatasi oleh al-Sunnah.

### 3. Sebagai sumber untuk mengetahui dan mengenali *nasikh* dan *mansukh* di dalam al-Quran.

Dalam perkara ini al-Sunnah memainkan peranan yang penting kerana pensabitan *nasikh* dan *mansukh* bukan dibuat berdasarkan pemikiran dan ijtihad tetapi ayat-ayat tertentu perlu dikenal pasti melalui al-Sunnah. Al-Sunnah juga berperanan sebagai dalil dan bukti untuk mengenal dan mensabitan *nasikh* dan *mansukh* al-Quran.

Menurut al- Imam as-Syafie al-Quran dimansuhkan al-Quran, bukan oleh al-Sunnah kerana al-Sunnah tidak setaraf dengan al-Quran. Al-Sunnah hanya sebagai penerangan dan penjelas sesuatu ayat yang telah dimansuhkan oleh ayat yang lain. Dengan ini, pensabitan *nasikh* dan *mansukh* adalah peranan al-Sunnah.

Bagaimanapun pendapat al-Imam as-Syafie ini bercanggah dengan pendapat beberapa ulama dan beberapa orang pengikutnya seperti al-Baidawi dan al-Asnawi. Mereka berpendapat, al-Sunnah bukan sahaja menjadi bukti dan dalil pensabitan *nasikh* dan *mansukh* al-Quran, malahan lebih jauh daripada itu, al-Sunnah boleh memansuhkan al-Quran. Contohnya dalam ayat yang berikut, Allah swt berfirman :

كُتِبَ عَلَيْكُمْ إِذَا حَضَرَ أَحَدُكُمْ الْمَوْتُ إِنْ تَرَكَ خَيْرًا الْوَصِيَّةَ لِلْوَالِدَيْنِ وَالْأَقْرَبِينَ  
بِالْمَعْرُوفِ حَقًّا عَلَى الْمُتَّقِينَ ﴿١٨٠﴾

Bermaksud : Diwajibkan atas kamu, apabila datang seorang di antara kamu (tanda-tanda) maut, jika ia meninggalkan harta yang banyak, berwasiatlah untuk ibubapa dan kaum kerabatnya secara ma'ruf, (Ini adalah) kewajiban atas orang-orang yang bertakwa  
(Surah al-Baqarah ayat 180)

Ayat ini telah dimansuhkan oleh al-Sunnah iaitu hadis Rasulullah saw yang bermaksud *tiada wasiat bagi penerima harta pusaka*.

### 4. Mengadakan hukum yang tidak disebut oleh al-Quran

Al-Sunnah juga berperanan mengadakan atau membina hukum-hukum yang tidak disebut oleh al-Quran. Keadaan ini diiktiraf oleh Allah swt sepertimana firmanNya yang menyebutkan :

الَّذِينَ يَتَّبِعُونَ الرَّسُولَ النَّبِيَّ الْأُمِّيَّ الَّذِي تَجَدَّدُونَهُ مَكْتُوبًا عِنْدَهُمْ فِي التَّوْرَةِ  
وَالْإِنْجِيلِ يَأْمُرُهُم بِالْمَعْرُوفِ وَيَنْهَاهُمْ عَنِ الْمُنْكَرِ وَهُمْ لَهُمُ الطَّيِّبَاتِ وَتُحَرِّمُ عَلَيْهِمُ  
الْخَبِيثَاتِ وَيَضَعُ عَنْهُمْ إِصْرَهُمْ وَالْأَغْلَالَ الَّتِي كَانَتْ عَلَيْهِمْ .

Bermaksud : Orang-orang yang mengikut rasul, nabi yang ummi yang (namanya) mereka dapati tertulis di dalam Taurat dan Injil yang ada di sisi mereka, yang menyuruh mereka mengerjakan yang ma'ruf dan melarang mereka dari mengerjakan yang mungkar dan menghalalkan bagi mereka segala yang baik dan mengharamkan bagi mereka segala yang buruk dan membuang dari mereka beban-beban dan belenggu-belenggu yang ada pada mereka .

Beberapa contoh hukum yang dibawa oleh al-Sunnah ialah hukum memakai emas bagi lelaki, zakat fitrah, dan sebagainya.

### **Al-Sunnah : Sumber Pendidikan Sepanjang Hayat**

Menurut Hassan Langgulung (1981) al-Sunnah turut memainkan peranan penting di dalam usaha untuk memahami pendidikan yang digariskan oleh Islam kerana Rasulullah saw mencerminkan akhlak al-Quran dalam segala tindak tanduknya, maka Allah memberinya tempat khusus di kalangan orang-orang Islam.

Menurut Hj Abdullah Ishak (1995), sumber utama bagi pendidikan Islam ialah al-Quran dan al-Sunnah. Kandungannya mencakupi berbagai aspek kehidupan manusia yang begitu komprehensif dan lengkap terutamanya bagi membentuk peribadi insaniah yang unggul dari segi rohani, jasmani, akal, citarasa dan sosial supaya dapat berfungsi sebagai hamba dan khalifah Allah swt di bumi ini.

Dr Ahmad Shalaby (1984) menyifatkan al-Sunnah sebagai sumber yang tidak pernah tohor atau kering, sumber yang melahirkan contoh-contoh teladan yang baik serta terbukti pada budi pekerti Rasulullah saw. Dari sumber inilah melimpahnya petunjuk, pendidikan dan adab sopan.

Dr. Nik Aziz Nik Pa (1996) menyenaraikan sumber-sumber perkhbaran adalah

- i. al-Quran
- ii. al-Sunnah
- iii. Ijmak

- iv. Ijmak Ulama Muktabar
- v. Pendapat umum para ilmun, ahli sains, atau ahli bijakpandai.

Menurut Mohd Radzi Othman (2005), kewibawaan ilmun muslim itu banyak bergantung kepada usaha mendampingi al-Quran dan al-Sunnah sebagai sumber ilmun di samping penerokaan ilmun yang telah dilakukan dalam apa jua bidang sekalipun.

Konsep pendidikan Rasulullah saw bertujuan untuk mendidik, membentuk serta melatih individu dalam pelbagai aspek samada jasmani, rohani, akal, akhlak dan kesedaran sosial bagi melahirkan manusia yang sempurna. (Azhar Hj Md Aros 2004)

Al Sunnah sebagai sumber pendidikan yang menggarapkan konsep pendidikan sepanjang hayat bolehlah dikategorikan seperti berikut :

### **1. Peringkat Awal Manusia.**

Al- Sunnah berperanan mendidik manusia bermula sejak mencari jodoh lagi bagi menjamin zuriat yang dilahirkan bakal menjadi manusia yang sempurna dan bertaqwa. Sesuai seperti sabda Rasulullah saw yang bermaksud :

Dinikahi wanita itu kerana empat perkara: kekayaan, kedudukan, kecantikan dan agamanya. Utamakanlah yang beragama, nescaya bahagialah hidup mu.

Hadis ini menuntut supaya mencari pasangan yang berpegang teguh dengan aqidah sebagai persediaan awal untuk pentarbiyahan anak-anak yang bakal dilahirkan supaya mencintai agama seterusnya berakhlak mulia seperti orang yang melahirkannya.

Malah bukan sahaja semasa memilih pasangan malah semasa melakukan persetubuhan juga hadis memerintahkan supaya membaca doa agar anak itu tidak dipengaruhi oleh syaitan. Seperti sabda Rasulullah saw yang bermaksud :

Dari Ibnu Abbas ra, dari Nabi saw bersabda : Kalau sesaorang kamu hendak mengauli isterinya, hendaklah dia berkata : Dengan nama Allah, Ya Allah jauhkanlah kami dari godaan syaitan, dan jauhkanlah syaitan itu dari apa yang engkau kehendaki untuk memberi rezeki kepada kami. Maka sesungguhnya ? Demikian Rasulullah berkata selanjutnya, jika ditakdirkan oleh Allah ada anak antara keduanya syaitan tidak dapat mengganggu anak itu buat selamanya.

(Riwayat Bukhari dan Muslim)

Kemudian semasa ibu sedang mengandung, digalakkan supaya banyak membaca al-Quran dan ketika bayi itu dilahirkan sangat dituntut supaya dilaungkan azan pada telinga kanan dan iqamah di telinga kiri.

## 2. Peringkat Kanak-kanak dan Dewasa Manusia.

Dari peringkat awal zaman kanak-kanak sehingga ke peringkat dewasa, sepanjang hayat dan perjalanan hidupnya itu, manusia sentiasa dididik oleh al-Sunnah dengan berbagai panduan, bimbingan dan petunjuk. Di antaranya seperti berikut :

### (a) Pendidikan Keimanan

Sabda Rasulullah saw bermaksud :

Ukuran ketahanan seseorang tidak terletak pada kekuatan ia berkelahi, tetapi ketahanan itu terletak pada kemampuannya menguasai nafsu sewaktu dia marah

(Hadith Riwayat Bukhari dan Muslim)

Sabda Rasulullah saw bermaksud :

Bekerjalah dengan taat kepada Allah dan jauhilah maksiat terhadap Allah dan suruhlah anak-anakmu supaya menurut perintah dan menjauhi larangan. Maka itulah pemeliharaan diri kamu dan diri mereka dari azab neraka

(Riwayat Ibnu Abbas dari Ibnu Jarir dan Ibnu Munzir).

Sabda Rasulullah saw bermaksud :

Ajarlah anak-anakmu tiga perkara, mencintai Nabimu dan mencintai keluarganya serta membaca al-Quran kerana pembaca al-Quran berada di sisi *arasy* Allah bersama para *anbiya'* dan orang-orang suciNya pada hari tiada naungan melainkan naungan Allah

(Hadis Riwayat Tabrani dari Ali bin Abi Talib)

### (b) Pendidikan Ibadah

Sabda Rasulullah saw bermaksud :

Suruhlahlah anakmu bersembahyang pada waktu mereka berumur 7 tahun dan pukullah mereka kalau tidak mahu bersembahyang sewaktu mereka berumur sepuluh tahun. dan pisahkanlah mereka di tempat tidur.

(Hadis Riwayat Abu Daud, al-Turmuzi, Ahmad, al Hakim, Bukhari dan Muslim).

Sabda Rasulullah saw bermaksud :

Tiadalah duduk sesuatu kaum menyebut Allah melainkan mereka diselubungi oleh malaikat dengan rahmat Allah dan diturunkan ketenangan kepadanya, Allah juga menyebut-nyebut mereka itu di hadapan orang-orang yang disisinya.

(Hadis Riwayat Muslim)

Sabda Rasulullah saw bermaksud :

Hebat sekali keperibadian orang mukmin iaitu kerana setiap kejadian yang menimpa dirinya dianggap baik. Hal ini tidak mungkin ada pada peribadi selain mukmin. Apabila ia memperoleh kenikmatan bersyukur yang dengan syukurnya memperoleh sesuatu yang

lebih baik dan apabila ia menderita kesusahan bersabar, maka sabar itu lebih baik baginya.

(Hadis Riwayat Bukhari dan Muslim)

**(c) Pendidikan Akhlak**

Sabda Rasulullah saw bermaksud :

Muliakan anak-anakmu dengan memperbaiki sopan santunnya

(Hadis Riwayat Ibnu Majah dari Ibnu Abbas)

Sabda Rasulullah saw bermaksud :

Peliharalah dirimu dari dusta kerana sesungguhnya dusta itu membawa kepada kecurangan dan kecurangan membawa ke neraka.

(Hadis Riwayat Bukhari)

Sabda Rasulullah saw bermaksud :

Belum sempurna iman seseorang dari kamu sehingga mengasihi saudaranya sebagaimana dia mengasihi dirinya sendiri

(Hadis Riwayat Bukhari dan Muslim)

Sabda Rasulullah saw bermaksud :

Sesiapa yang menyerupai sesuatu kaum maka dia termasuk dari golongan itu.

(Hadis Riwayat Abu Daud)

Sabda Rasulullah saw bermaksud :

Allah melaknat wanita yang berlagak lelaki dan lelaki yang berlagak wanita

(Hadis Riwayat Ahmad, Abu Daud dan Ibnu Majah)

Sabda Rasulullah saw bermaksud :

Sesiapa yang memudahkan kesusahan saudaranya dalam kesusahan dunia, nescaya Allah akan mudah kesusahannya di Hari Kiamat

**(d) Pendidikan keluarga**

Sabda Rasulullah saw bermaksud :

Tidak ada susu yang lebih besar berkatnya daripada susu ibu

(Ibnu Rusyd dalam al-Muqaddimah)

Sabda Rasulullah saw bermaksud :

Setiap bayi dilahirkan dengan fitrah. Hanya ibu bapanyalah yang menjadikan ia Yahudi atau Nasrani atau Majusi

(Hadis Riwayat al-Tabrani dan al-Baihaqi)

Sabda Rasulullah saw bermaksud :  
Awasilah anak-anakmu dan perbaikilah adabnya.

(Hadis Riwayat Ibnu Majah)

Sabda Rasulullah saw bermaksud :  
Tidaklah memberi seorang ayah kepada anaknya lebih baik dari adab yang baik.

(Hadis Riwayat al-Turmuzi)

Sabda Rasulullah saw bermaksud :  
Jika seseorang mempunyai tiga orang anak perempuan atau tiga anak adik beradik dan memperbaiki pendidikan mereka nescaya masuk syurga

(Hadis Riwayat al-Bukhari, Abu Daud dan al-Turmuzi)

Sabda Rasulullah saw bermaksud :  
Berubatlah sebab yang menciptakan penyakit juga menciptakan ubat.

(Hadis Riwayat Ahmad)

Dalam riwayat Muslim dari al Sya'abi, Rasulullah saw bersabda yang bermaksud :  
Berbuat adillah di antara anak-anakmu sebagaimana kamu suka mereka berbuat adil antara kamu.

Diriwayatkan dari Abu Hurairah beliau berkata : Rasulullah saw mencium Hassan bin Ali sedang al-Aqra' bin Habis al-Tamimi duduk disampingnya, maka al-Aqra' berkata aku mempunyai 10 anak belum pernah aku cium seorang pun di antara mereka, Rasulullah memandangnya sambil berkata : Sesiapa tidak mengasihi, dia tidak akan dikasihi

(Hadis Riwayat al Bukhari dan Muslim).

Sabda Rasulullah saw bermaksud:  
Baikkanlah nama namamu sebab Allah memanggilmu dengan nama itu di hari kiamat  
(Hadis Riwayat Muslim, Abu Daud dan al Turmuzi).

Sabda Rasulullah saw bermaksud :  
Hak anak kepada orang tuanya ada tiga : Memberinya nama yang baik, mengajarkannya menulis dan mengahwinkannya bila dia telah baligh.

(Hadis Riwayat al Tabarani).

Sabda Rasulullah saw bermaksud :  
Sesungguhnya orang muslim kalau ia membelanjai keluarganya maka ia adalah sedeqah

(Riwayat yang lima kecuali Abu Daud).

Sabda Rasulullah saw bermaksud :  
Dunia adalah kesenangan sementara dan sebaik-baik kesenangan dunia adalah wanita yang soleh

(Hadis Riwayat Muslim)

**(e) Pendidikan Kesihatan**

Sabda Rasulullah saw bermaksud :

Tiada yang dipenuhi anak Adam suatu bekas yang lebih merbahaya dari perutnya. Memadailah anak Adam itu beberapa suap (makanan) yang akan menegakkan punggungnya. Sekiranya mesti dilakukannya, maka biarlah sepertiga untuk makanannya, sepertiga untuk minumannya dan sepertiga untuk pernafasannya.

(Hadis Riwayat Imam Ahmad dan at Tarmizi).

Sabda Rasulullah saw bermaksud :

Seandainya tidak memberatkan umatku, nescaya aku wajibkan mereka bersugi (gosok gigi) setiap kali hendak sembahyang sebagaimana aku wajibkan mereka berwudhu'

(Hadis Riwayat Bazzar dan Tabrani)

Sabda Rasulullah saw bermaksud :

Ajarlah anak-anak berenang dan memanah

(Hadis Riwayat Ad Dailami)

Sabda Rasulullah saw bermaksud :

Jauhi arak kerana sesungguhnya arak itu adalah kunci segala kejahatan.

(Hadis Riwayat Hakim)

Sabda Rasulullah saw bermaksud :

Sesungguhnya orang-orang yang berzina itu wajah mereka akan menyala nyalakan api

(Hadis Riwayat Tabrani)

Sabda Rasulullah saw bermaksud :

Perkara yang sangat aku takuti atas umatku ialah perbuatan kaum Lut.

(Hadis Riwayat Ibnu Majah dan Tarmizi)

Sabda Rasulullah saw bermaksud :

Orang Mukmin yang kuat lebih baik dan lebih dicintai oleh Allah daripada orang mukmin yang lemah.

(Hadis Riwayat Muslim)

Sabda Rasulullah saw bermaksud :

Ketahuiilah bahawa di dalam tubuh itu ada mudghah , apabila ia baik, baiklah tubuh seluruhnya dan apabila rosak, rosaklah tubuh seluruhnya, ketahuilah dia adalah hati.

(Hadis Riwayat Bukhari dan Muslim)

**(f) Pendidikan kerjaya**

Sabda Rasulullah saw bersabda :

Semulia-mulia pekerjaan ialah usaha sesorang dengan tangannya sendiri.

(Hadis Riwayat Imam Ahmad)

Sabda Rasulullah saw bersabda :

Bekerjalah kamu untuk kepentingan dunia seolah-olah kamu akan hidup selama-lamanya dan bekerjalah untuk kepentingan akhiratnya seolah olah kamu akan mati esok pagi.

(Hadis Riwayat Ibnu Asakir)

Sabda Rasulullah saw bersabda :

Sesungguhnya Allah mengasihi orang yang lemah lembut dalam semua kerjayanya.

(Hadis Riwayat Bukhari)

**3. Peringkat Akhir Kehidupan dan Pendidikan Manusia**

Jika dilihat dari sudut pendidikan al-Sunnah seperti yang telah dibentangkan sebahagiannya di atas, jelaslah kepada kita bahawa konsep pendidikan al-Sunnah adalah berterusan sepanjang hayat manusia di mukabumi ini. Sehingga di penghujung kehidupan manusia, iaitu pada saat-saat nazak (hampirnya kematian), mereka diajarkan dengan kalimah syahadah seperti yang dinyatakan dalam hadis Rasulullah saw dan akhir sekali, pendidikan al-Sunnah berakhir diliang lahad, apabila mayat itu dibacakan talqin.

## Kesimpulan

Al- Sunnah sangat berperanan dalam pendidikan manusia. Bermula seawal kejadian manusia sehingga ke penghujung perjalanan hidupnya. Sesuai dengan falsafah Pendidikan Islam yang menekankan konsep pembelajaran sepanjang hayat. Seperti yang disebut dalam hadis Rasulullah saw yang mewajibkan umatnya menuntut ilmu.

Dari Anas bin Malik, sabda Rasulullah saw bermaksud :  
Menuntut ilmu adalah fardhu bagi setiap orang Islam.

Dalam hadis yang lain, Rasulullah saw bersabda yang bermaksud :  
Tuntutlah ilmu daripada buaian hingga ke liang lahad

Bukan melalui sunnahnya sahaja malah diri Rasulullah saw itu sendiri sebagai sumber pendidikan. Oleh itu tidak hairanlah bila al-Quran menyebutkan bahawa Rasulullah saw itu, sebagai pendidik yang terbaik kerana mendapat asuhan dari Allah yang Maha bijaksana.

Firman Allah swt dalam surah al-Baqarah ayat 151:

كَمَا أَرْسَلْنَا فِيكُمْ رَسُولًا مِّنكُمْ يَتْلُوا عَلَيْكُمْ آيَاتِنَا وَيُزَكِّيكُمْ وَيُعَلِّمُكُمُ الْكِتَابَ  
وَالْحِكْمَةَ وَيُعَلِّمُكُم مَّا لَمْ تَكُونُوا تَعْلَمُونَ ﴿١٥١﴾

Bermaksud : Sebagaimana (Kami telah menyempurnakan nikmat kami kepadamu) kami telah mengutus kepadamu Rasul di antara kamu yang membacakan ayat-ayat Kami kepada kamu dan mensucikan kamu dan mengajarkan kepadamu Al Kitab dan Al-Hikmah (al-Sunnah), serta mengajarkan kepada kamu apa yang belum kamu ketahui.

Sabda Rasulullah saw yang bermaksud :

Allah mendidikku, maka ia memberiku sebaik-baik Pendidikan.

**Allahu a'lam**

## Rujukan :

1. Wan Mohd Nor Wan Daud , terj : Rosnani Hashim. 1994. *Konsep Ilmu*. Kuala Lumpur : Dewan Bahasa & Pustaka
2. H.A Razak & H. Rais Lathief. 1978. *Terjemahan Hadis Shahih Muslim*, Jakarta : Penerbit Pustaka al-Husna.
3. Drs. H. Moh. Zuhri. 1992. *Terjemah Sunan at Tirmidzi*. Jakarta : C.V Asy Syifa'.
4. Bey Arifin, 1992. *Tarjamah Susnan Abi Daud*, Jakarta : C.V Asy Syifa'
5. Abdullah Ishak. 1995. *Pendidikan Islam dan Pengaruhnya di Malaysia*. Kuala Lumpur : Dewan Bahasa dan Pustaka.
6. Ahmad Shalaby. terj : Muchtar Jahja 1984. *Masyarakat Islam*, Singapura : Pustaka Nasional
7. Mohd. Radzi Othman et al. 2005. *Warisan al-Quran Peradaban Manusia*. Penang : USM
8. Nik Aziz Nik Pa. 1996. *Kesepaduan Dalam Pendidikan Matematik di Malaysia, Konsep dan Strategi*. Kuala Lumpur : Kementerian Pendidikan Malaysia.
9. Ahmad Syalabi. 1978. *Tarikh al-Tarbiyya al-Islamiyyah*. Cairo: Maktab al-Nahdah al-Misriyyah.
10. Ghazali Darussalam. 2001. *Pedagogi Pendidikan Islam*. Kuala Lumpur : Utusan Publication & Distributors Sdn. Bhd.
11. Azhar Md Aros. 2004. *Tamadun Islam dan Tamadun Asia* . Kuala Lumpur : Penerbit Fajar Bakti.
12. Mahayudin Hj Yahya. 2001. *Tamadun Islam*. Kuala Lumpur : Penerbit Fajar Bakti.
13. Prof. Dr Hasan Langgulung. 1986. *Manusia dan Pendidikan: Suatu Analisa Psikologi dan Pendidikan*. Jakarta : Penerbit Pustaka al-Husna
14. Drs. Hanafi Mohamed. 1996. *Falsafah Pendidikan Menurut al-Quran*. Selangor : Pustaka Ilmi
15. Mahmud Hamdi Zaquq. 1989. *Orientalisme : Kesan Pemikirannya Terhadap Tamadun Islam*. terj : Mudasir Rosder & Che Yusuf Che Mat. Kuala Lumpur : Dewan Bahasa dan Pustaka.

**Universiti Kebangsaan Malaysia  
Fakulti Pendidikan**

**KEDUDUKAN AL-SUNNAH  
DALAM  
SISTEM PENDIDIKAN ISLAM.**

**Pensyarah : Ybhg. Dr. Ab. Halim bin Tamuri  
Kursus : Sumber-sumber Pendidikan Islam  
Kod : GC 6423**

**Pelajar : Abd. Shukor bin Mohd Ali  
No. Pelajar: P38997  
Sesi : Jan-Mei 2007**